

善本書室藏書志

善本書室藏書志卷十七

錢坫丁丙松生甫輯

子部六

天文大象賦一卷

孫星衍鈔本

沈氏藏書

隋李播撰苗爲注

宋史藝文志載張衡大象賦一卷苗爲注賦見於明張溥所輯張衡集中稱爲週天大象賦歷代賦彙采其文而注本失傳錢唐孫之騷手錄苗注孫星衍得之與顧廣圻攷新唐書藝文志定爲李播撰播淳風父也苗爲無攷蓋五代已前人既校刊於平津館續古文苑中此其底本耳有孫星衍顧廣圻手跋有沈聞崑印東山外史肖巖沈氏藏書之印孫之騷嘗著晴川八識宋寶祐四年丙辰歲會天萬年具注錄一卷

彭朱鈔本

琴川張氏

保章正充同知算造兼主管文德殿鐘鼓院荆執禮及楊旂相師

堯

前載太史局先準中書省劄子奉聖旨二十四日氣應時令印造單狀於歷日前連黏頒賜施行今據換授保章正充同知算造譚玉等依會天歷推算到丙辰歲節氣加時辰刻頒賜具如後右謹具呈靈臺郎判太史局提點歷書鄧宗文成永祥李輔卿下接十二月日凡三百五十四日後載右件人神所在及血忌血支不可鍼灸出血日遊在房內產婦不宜於方位上安牀帳及埽舍皆凶秀水朱彝尊跋云會天歷初名顯天清祐十二年太府寺丞張湜等推算畧見宋史律歷志旣而寶祐改元定名會天尤學靖被命作序鏤版印行莫可數計歲更無存是本崑山徐閣老公肅所藏余假之錄副阮相國影鈔進呈見孳經室外集此爲張蒼塘影寫本有錢竹汀黃蕤圃跋語有小琅嬛福地繕鈔珍藏清河世家各印

儀象法纂一卷

明鈔本

湯穆堂藏書

光祿大夫吏部尚書兼侍讀上護軍武功郡開國侯臣蘇頌上

頌字子容南安人徙丹徒慶歷二年進士官至右僕射中書門下侍郎累爵趙郡公宋史有傳是書前列進狀稱歷代天文之器制範頗多法亦小異至於激水運機其用則一蓋天道運行不息水者注之不竭以不竭逐不息之運苟挹注均調則參校旋轉之勢無有差舛凡繪渾儀圖六合三辰四游天經雙環陰緯單環天常單環三辰儀雙環赤道單環黃道雙環四象單環天通單環四游儀雙環望筒直距龍柱鼇雲水趺渾象毬置渾象樞輪天殼天柱天衡天河昇水上下輪渾表圭表又中星八圖及日星占圖各載圖說成於紹聖初殆遂初堂書目與宋藝文志所稱紹聖儀象法要一卷是也今四庫著錄新儀象法要三卷乃元祐間重修乾道壬辰吳興施元之刻於三衢錢曾

影寫之本雖圖說增多中有元之據別本補入者轉不若此之初進本矣有湯聘印聘字萃來號稼堂仁和人乾隆丙辰進士古今歷律攷七十二卷 明刊本

陝西按察使安肅邢雲路編輯

前後有滿城魏文魁同郡孫承宗西齊徐安馬英序跋及雲路自序雲路字士登安肅人萬歷庚辰進士官至陝西按察司副使是攷詳於歷而略於律言律者僅六卷惟辨李文利黃鍾三寸九分之非頗爲精當

右天文算法類推步之屬

測圓算術四卷 明刊本

吳興顧應祥著

嘉靖癸丑自序云元翰林學士樂城李先生所著測圓海鏡極爲明備已爲類釋既思猶有未當於心者蓋圓之內外其橫者

爲句直者爲股一橫一直或兩橫兩直相夾或一橫一斜一直
一斜自有天然對待之妙比而合之皆可類推而知於是別出
已見復爲編次名號雖因其舊詞則務簡而明後有癸丑龐嵩
序云第溪顧翁出句股算術測圓海鏡類釋二書示嵩性質庸
昧多所未了又越日翁復示測圓算術一編益躍然如節之有
關節之有相將取照而適途也不難矣按讀書敏求記而宋樓
藏書目所載測圓海鏡分類釋術十卷其自序年月爲嘉靖庚
戌與此相距蓋四年也

右天文算法類算書之屬

子部七

太元經十卷

明刊本

晉望字叔明解贊

前有漢蘭臺令史班固撰楊雄傳又陸績述元唐宰相王涯說

元五篇釋文一卷及分畫四重元圖末有記曰楊氏本自元首
已下至元告凡十一篇並是宋衷解詁陸續釋文共爲一注范
望采二君之業折衷長短或加新意就成此注仍將元首加經
贊之上元則附逐贊之末餘自元衡以下以元告九篇列爲四
卷三家義訓互有得失以待賢者詳而正焉此明玉鏡堂依宋
重刊敬貞字皆有缺筆

揚子太元經十卷

明刊本

序爲元豐五年司馬光撰云漢五業主事宋衷始爲解詁吳鬱
林太守陸續作釋文晉尙書郎范望作解贊唐門下侍郎平章
事王涯注經及首測宋興都官郎中宋惟翰通爲之注秦州天
水尉陳漸作演元司封員外郎吳祕作音義慶厯中得此數書
又作說元疲精勞神三十餘年以用心之久棄似可惜乃依法
言爲集注庶來者有取焉其直云宋者仲子也云小宋者都官

郎中也卷七起測衝錯擲瑩注一卷元數規一卷元文元注一卷元圖告注一卷爲襄陵許翰撰仿韓康伯注繫辭合王輔嗣注爲全書例也此書爲天啟丙寅錢塘張元微夢珠序又武林趙世楷繩美題識錢塘趙如源濬之甫閱同社王道焜昭平朱欽明堯心校皆鄉先達所研習也更爲小庾臨惠硯溪先生校語尤爲顯目有華亭梅氏藏書柏峴山人二印惜小庾未知其人耳

元包經傳五卷附元包數總義二卷

明覆宋蜀大字本

顧從君藏

後周衛元嵩述唐祕書少監武功蘇源明傳唐國子監四門助教趙郡李江注并序總義蜀臨邛張行成述

紹興三十一年南陽張洸跋云先君子藏此書字古理奧而難通好之者鮮洸來宰臨邛得同年張文饒所爲疏義及邑士輩漢卿校正舊本隨卦附釋音於下因併鏤版合爲一編前有政

和元年楊楫舊序謂元嵩益州成都人潛心至道明陰陽歷算獻策後周賜持節蜀郡公武帝尊禮不敢臣之汲古閣祕本書目有蜀大字本元包經傳每半葉八行行十六字此卽覆本有秀野草堂顧氏藏書印簡莊藝文兩印蓋又爲陳仲魚藏也

皇極經世書十二卷觀物篇二卷

明刊鈔配本

右書十二卷其一之二則總元會運世之數易所謂天地之數也三之四以會經運列世數與歲甲子下紀帝堯至於五代歷年表以見天下離合治亂之迹以大時而驗人事者也五之六以運經世列世數與歲甲子下紀自帝堯至於五代書傳所載興廢治亂得失邪正之迹以人事而驗天時者也七之十則以陰陽剛柔之數窮律呂聲音之數卽以其數窮動植飛走之數易所謂萬物之數也十一之十二則論皇極經世之所以爲書窮日月星辰飛走動植之數以盡天地萬物之理述皇帝王霸

之事以明大中至正之道陰陽之消長古今之治亂較然可見矣故謂之觀物篇此邵伯溫述此之綱要也附觀物外篇二卷乃先生捐館後得之門人故舊所記亦足發明成書有吳澄跋并附漁樵問對及邵子遺文

皇極經世書卦元元集五卷

明鈔本

而東范氏舊藏

康節先生傳連山易于山林隱德之士以天一地二天三地四天五地六天七地八天九地十分十等曰元會運世歲月日時分秒作皇極經世書自元至時隸之卦而分秒行乎八卦之間有卦有數天地人物皆囿於其中而卦數則窮物之理極物之變雖鬼神之不測天地之無窮亦不能逃焉元之又元改曰元元集按天一閣書目列此書於術數類藍絲闌鈔本目錄前序相同同治初得於甬上似范氏劫餘遺帙也

通變四十卷

影宋本

前有獨臨印張行成自序每葉十六行每行十六字版心有通書等字顧宋樓主人陸存齋跋云此本流傳甚少外間僅有宋本及明費宏家鈔本費本作皇極經世通變宋本但題通變而無易字此本每卷首行亦但題通變二字而無易字與提要所云宋本相合案行成字文饒四川臨邛人紹興二年進士學易于謀定官右迪功郎紹興九年五月獻芻蕘書二十篇又獻七引一篇託晉元帝以寄意不報丐祠歸杜門十年著此書取陳搏至邵雍所傳先天卦數十四圖以通諸易之變中間屢稱先生之意蓋述其師譙定之說也因補鈔 文淵閣書亦影寫而藏焉

皇極經世解觀物篇十一卷起數訣起數例一卷

舊鈔本

楚東祝泌述

泌字子涇鄱陽人自號觀物老人自署銜稱永直郎充江淮州

福建廣東路都大提點坑冶鑄錢司幹辦公事又署接領所幹辦公事不知終於何官白序末題端平乙未又清祐辛丑相距六年耳是書觀物解十一卷起數訣例一卷與朱彝尊經義攷泌撰皇極經世鈐十二卷之數相合而四庫觀物篇解作五卷起數訣作一卷不相合提要云泌自序大旨又頗相近或一書兩名而後人合併歟

天原發微五卷

明嘉靖秦藩刊本

葉文莊邵二雲藏書

魯齋鮑雲龍景翔編著虛谷方回萬里校正謚齋鮑甯庭謚辨正前有前至元庚寅紫陽後學鮑雲龍自序又至元辛卯元貞丙申方回萬里兩序元貞丙申曹涇跋大德己亥剡源戴表元後序謂新安方使君出其故人鮑景翔天原發微自太極渺茫之始至於形之所倚氣之所使數之所像器之所擬精粗內外無所不紀而綱提領挈出於使君指畫不一景翔嘗以鄉貢進士

一詣春官不售歸食谷終身鄉長者提學鄭君孔明館穀之朝
夕與其講學書成遂爲版傳之慰其遺志明天順辛巳鮑甯重
加辨正並著各類圖問答節要序而重刊之此則嘉靖庚戌秦
藩掌中道人重爲梓行並自序也有葉氏萊竹堂藏書邵氏二
雲鳴野山房各印乾隆間又有重刻本雲間沈大成敘之今亦
罕見則此更可貴矣

範圍易數明斷精義不分卷二十四冊

明鈔本

按天一閣書目術數類有數書探賸四冊索隱五冊鉤深三冊
致遠二冊烏絲闌棉紙鈔本不著撰人名氏此書或其舊帙有
四明沈延禧茂叔私印孔皆沈延禧一名茂觀物所諸印

右術數類數學之屬

唐開元占經一百二十卷

舊鈔校本

銀青光祿大夫行太史監事門下同三品臣瞿曇悉達等奉敕修

撰

唐書藝文志玉海皆載一百十卷當爲悉達原書後十卷或後人以雜占增附所言占驗之法援引緯書有七十餘種之多隋志載緯書八十一篇後皆不傳此猶尙存八九萬厯四十四年古歙程明善跋云余因布施裝金得此於古佛腹中不知藏之何代錄於何人一旦宣洩流布人間亦足徵余藏書好道之報明善之兄明哲與張一熙同有跋語末有嘉慶丙寅蔣二松校於安德糧道署小平津館朱筆記中多據千里校語更有不語翁一印

素問六氣元珠密語十七卷

鈔道藏本

啟元子王冰述

宋史藝文志有王冰素問六脈元珠密語一卷序稱十卷豈宋志十誤爲一而此則十七卷鈔自道藏者前有贍德元年自序

稱專心問道執志求賢得遇元珠乃師事之又稱爲元珠子密而口授之又稱此十卷書可見天之令運之化地產之物將來之災害可以預見之云云按王冰內經序云別撰元珠以陳其道林億等校正云王氏元珠世無傳者今有元珠十卷蓋後人附託之文雖非王氏原書亦於素問十九卷至廿二四卷頗多發明

天文鬼料竅四卷

精鈔本

遂初堂初氏舊藏

晉丹元子撰王希明注

右步天歌三十一首卽二十八宿三垣歌訣也每句下希明更詳注之鄭樵通志稱步天歌只傳靈臺不傳人間術家祕之名曰鬼料竅卽步天歌也錢遵王讀書敏求記作天文機要鬼料竅十卷此則四卷不附列汪默渾天注疏與張孝忠渾象圖說耳有乾隆五十有七年遂初堂初氏記長印

天元玉厯祥異賦七卷

明刊本

前有洪熙元年正月十五日御製序自卷一天地所霜篇至卷七旋風占篇凡五十有五以天象之示現衍賦體爲占驗當時分賜廷臣者有廣運之寶內府之章二方

大明清類天文分野書二十四卷

明鈔本

鄭端簡蔣生沐藏書

此書明太祖命劉青田及鐵冠道人屬稿洪武十七年甲子閏十月二十七日進始於斗牛吳越分野著開天之神功終以雲漢之末派龜魚麗焉卽一書之始終可作運命論讀矣錢遵王讀書敏求記謂後之修明史者於此微輿地志更何煩他求近山陽丁氏晏引清河汪氏椿論劉誠意天文分野書以星土本於周禮其占錯見左傳其法以國分配漢晉諸志少變其例以州郡分配此乃更以一州一縣推測剖析但不載占驗而已余別藏刊本版式甚寬茲則鈔木有淡泉大司寇章二印蓋鄭端

簡曉舊帙也又有蔣光煦印生沐祕藏各印光煦字愛荀號生沐海甯人諸生其別下齋藏書宋槧元鈔與吳氏拜經樓均刻有別下齋叢書涉間梓舊二種有功學者

三才世緯一百卷

鈔本

康熙間人撰不著名氏三才者天地人也天者言天象日月星辰水火變異災祥也其中語氣諸說他書罕見地者中華十八省輿圖形勢險要及山川變異災祥也人者乃太乙數言國家天人感應之得失也此海鹽陳其晉字康齋訓導所贈特爲志之

右術數類占候之屬

楊益城龍經一卷

精鈔本

按陳振孫書錄解題載唐楊筠松之名宋舊文志但稱爲楊救貧不詳其始末惟術家相傳筠松名益賓州人掌靈臺地理官

至金紫光祿大夫廣明中遇黃巢亂竊禁中玉函祕術而逃後
往來虔州無稽之說也此本爲原始貪狼星巨門星祿存星文
曲星廉貞星武曲星破軍星左輔星右弼星九星結穴諸條附
錄誠意伯談龍一則爲鐵嶺高其偉文良評本夕陽亭長刪補
末有嘉慶十五年錢塘莫濰識於翠雲書齋一則云撼龍俗本
移置篇文顛倒節次潔身亂倫之謬淫邪撒網之譌指不勝屈
抉筭松妙緒削無賴穢詞文良居鐵崖嶺有耳食錄余發微去
僞無非存其本來面目耳濰字濰山乃柳亭之姪

靈城精義二卷

舊鈔本

南唐何溥撰明劉基注

諸家書目皆不載館臣從大典輯出大旨以元運爲主乃明初
甯波幕講僧之學五代安有是說溥之仕履又無所攷殆爲依
託惟詞旨明暢猶術士之能文者所作

地理正宗六卷

明宏治刊本

右明宏治丁巳浮梁程廷珙序云地理之得爲正宗者鮮惟青
烏葬經郭璞葬書劉謙囊金蔡成禹發微陶侃卜則魏尋龍捉
脈雪心二賦凡六家則異是也廣右左轄舒公本直好古而正
嘗收書具得之梓於藩以傳而命之曰地理正宗按郭景純葬
書元吳澂注建安蔡季通去其謬妄者十之二而存其八就其
所有猶不無顛倒混淆分內篇四外篇二雜篇二洵爲最善之
本青烏先生葬經四庫入存目尋龍捉脈賦晉陶侃撰發微
論十六章宋牧堂蔡成禹著明新安謝昌注囊金宋上宰劉謙
著明謝昌注雪心賦二十章章貢卜則魏著明謝昌注後四種
皆四庫未收可備堪輿之一助

堪輿仙傳四祕四卷

明刊本

右堪輿四祕一爲郭景純葬書古本收入四庫者也一爲賴

布衣披肝露膽祕訣江右賴文俊撰 四庫附存則題劉基撰
提要所稱筆架科名應有分滿牀牙笏世爲官此本作筆架三
台卿與相後所稱附南北平陽論數條此本亦無或尙是原本
一爲楊筠松安門祕法筠松著有撼龍經疑龍經葬法倒杖青
囊奧語天玉經內傳外編無安門祕法或於各書內摘其要數
一爲吳望江造福祕傳地理大全中亦不收此種有申時行撰
序望江名天洪欽人自稱了隱有萬曆辛巳自序郭書題古杭
張文介惟守校賴書題錢塘希谷張尙方校封面中題河南張
氏梓行葬書皆坊刻惡鈔此尙是明刊存以備攷

右術數類相宅相墓之屬

靈棋經一卷

舊鈔本

晉駕部郎中顏幼明宋御史中丞何丞天注元廬山叔才陳師凱
明誠意伯劉基解

是經與焦氏易林相似顏何注主推驗陳劉解則衷易理闡發
入微後有詩章當是後人增入明正德間蜀周侍御得是書命
喬府判刊於杭郡有李達劉基董元錫序此則鈔本無序或爲
古本傳錄者

焦氏易林二卷

明嘉靖刊本

顧千里臨校陸貽典宋本

前有嘉靖辛酉瀋藩西屏道人書於敕賜勉學書院之修業堂
翻刊序接宋承議郎行祕書省校書郎黃伯思校定上序並前
漢書及孟康論兩條沙隨程迥記驗一則卷後有清祐辛丑直
齋題識成化癸巳彭華嘉靖四年姜恩題識此嘉慶乙丑元和
顧廣圻臨常熟陸貽典校本黃氏士禮居刊易林卽以此爲底
本有顧千里印一雲散人諸印

易林二卷

明刊本

盧抱經校宋本

漢焦贛著

前有唐會昌景寅歲王侁序沙隨程迥記驗筮儀盧召弓學士
以陸敕先臨宋本校又以道藏本覆校更正譌字丹黃密字辭
校最精惜已殘缺僅存二卷有數間草堂藏書記文弼校正兩
印

易傳三卷

明刊本

盧抱經藏書

漢東郡京房著吳陸績注

上中兩卷六十四卦下卷敘畧有數間草堂藏書文弼校正盧
文弼字紹弓三印以程榮本校勘也

右術數類占卜之屬

星命溯原五卷

鈔本

不著編輯姓名從天一閣本影鈔書凡五種一通元遺書二果
老問答三元妙經解四觀星要訣五觀星心傳口訣補遺皆推
衍唐張果之說雖出依託然實爲談五星者之祖本考李虛中

推命但用始生年月日支干以定休咎彼時尚無八字之說何有於五星然韓文公三星行已云我生在辰月宿南斗牛奮其角箕張其口而杜牧自作墓誌有余生於角星之語是以五星推命唐時亦盛行其說此書術士託之果老轉展祕傳藉以餽口至明始鋟木流傳談五星者莫先於此書矣

星命總括三卷

鈔本

遼耶律純撰

前有統和二年八月十三日自識云以翰林學士奉使高麗議地界聞其國師積星躔之學請於國王命見師詢學士論學有何所得因以得於生剋制化外十條各有詳注未審如何師曰末矣本之則無吾有偏正垣七政論并日月並明說計八篇又有二百字真經二十五題得之海上異人所傳而未嘗泄今子若不寶而重之必招譴於天乃對師焚香設誓拜而寶之文淵

閣萊竹堂並有其目別無傳本館臣從大典輯出洵罕得之祕笈也

玉管照神局三卷 精鈔本

南唐宋齊邱撰

齊邱字超回改字子嵩廬陵人以布衣累官至劍南東川節度使封楚國公得罪死南唐書有傳齊邱好術數凡挾象緯青烏姑布壬遁之術居門下者常數十輩皆厚以資之是書專論相術殆出於門客所爲而假其名歟宋藝文志焦氏經籍志皆作二卷書錄解題則稱玉管照神無局字十國春秋則稱玉管照神經讀書敏求記云作十卷且分陽局陰局之別皆不甚符合此從大典本錄出釐爲三卷其繪圖亦明晰無訛

五行精紀三十三卷 精鈔本

廬陵周必大跋云今士大夫至田夫野老人人喜於談命故其

藏書志卷十七

士

書滿天下清江鄉貢進士廖中伯禮連舉未第乃刻意於此會粹數十家之說章分件析攷驗得失較量淺深成精紀示余云云直齋書錄文獻通攷皆作三十四卷敏求記所載祇三十二卷此較多一卷所引星命家書五十一種皆世不經見者

古今讖鑒八卷

明景泰刊本

四明袁忠徹編輯

前有景泰二年自序云承敕纂歷代相書名曰人象大成已歸之祕府今歸老之暇更攷史籍所載相家事實有足徵者并以先子太常公類編所紀相蹟羣編八卷名曰古今讖鑒忠徹鄞縣人父珙字庭玉號柳莊嘗決成祖當有天下後官太常寺丞忠徹亦仕至尙寶卿明史入方技傳按天一閣本作四卷附自作象人賦此則無之且卷數作八殆別一刻歟

右術數類命書相書之屬

五行大義五卷

舊鈔本

上儀同三司城陽郡開國公蕭吉撰

前有自序吉字文休梁武帝之兄江陵陷遂歸於周爲儀同及隋受禪進上儀同煬帝嗣位拜太府少卿加位開府事迹見隋書藝術傳阮文達公得日本人活字本影寫進呈內府見石經室外集提要此又從活字本鈔出者舊藏杭州太守余士璵處

大統歷注六冊

明人精寫本

汪闥源藏書

不著撰人姓名首爲正月立春雨水二節及月令六候甲子月分吉神凶神下則宜祭祀行幸宴會遣使沐浴療病入學裁製興造動土開渠穿井栽種牧養嫁娶及不宜出行動土云云乃建除家造作頒行惡本之用猶之本朝協紀辨方也鈔本精善界畫分明洵明人寫本有讀知聖教藝芸精舍汪士鐘印三十

藏書志卷十七

十三

五峰園主人諸印

太乙起例十六冊

舊鈔本

錢遵王讀書敏求記載太乙統宗寶鑑二十卷云吾家藏舊鈔有二俱有大德癸卯曉山老人序其一附起例真數淘金歌三書各一卷其一後附林籌數專征集畧神機三鏡四書各一卷此書購得已久嘗交海鹽陳康哉廣文其晉論定康哉瞽目十年使其徒王連城秀才讀而諦聽旋復函云此與太乙統宗大全相同與圖書集成所採淘金歌用數各異歷久沿譌無從攷正其書自上古甲子至順治七年庚寅似爲明末從軍者所作專論兵家不及庶事第一冊演算起例第二冊以庚寅年月日時算作引子第三四五六七八冊歲占起例九十兩冊日占起例十一十二兩冊月占起例十三十四十五十六四冊時占陰陽二遁起例截用簡法亦尙有理姑存之以備他日推算月以

譚康哉之盲目不盲心云

五行類應九卷

明刊本

前有萬厯甲寅秋武進錢春自序春字枏谷萬厯甲辰進士後有溫陵蔡復一敘稱書初成於中州李淑通有序而張賁通者以重修附名然多蕪漏不雅馴以授司理侯君加地校而刻之司理復增損十四五始有法可觀詞頗翔雅異於術士之俚俗右術數類陰陽五行之屬

字部八

歷代名畫記十卷

明刊本

唐河東張彥遠撰

彥遠字愛賓宣和書譜中列其本傳今刻之卷尾有冰月軒鹿城楊世澤瑞生珍藏陸廷燦印諸印廷燦字扶照嘉定人官福建崇安知縣著有藝菊譜

益州名畫錄三卷

明刊本

江夏黃休復纂

前有景德三年五月虞曹外郎李昉序稱休復字歸本通春秋學校左氏公穀書鸞丹養親行達於世游心顧陸之藝深得厥趣自國朝伐蜀堂邑廨宇寺觀名畫纖悉無圯迨淳化甲午盜發二川焚劫略盡黃氏心鬱久之故存錄之自李唐乾元初至皇宋乾德歲其間圖畫之尤精取其目所擊者五十八人品以四格離爲三卷命曰益州名畫錄

唐朝名畫錄一卷

明刊本

吳郡朱景元撰

前景元自序景元官翰林學士錄分神妙能逸四品惟逸無等次餘則各分上中下三等共一百二十四人首列親王三人皆不入品第舊有天聖三年商宗儒序此刻已佚

米元章書史一卷 明翻宋本

是編評論前人真蹟皆以目歷者爲斷故始自西晉迄於五代凡印章跋尾紙絹裝褙俱詳載之卷末論印一條謂印關吉凶亦好異之見也

寶章待訪錄一卷附海岳名言一卷 明刊本

襄陽米芾

前有元祐丙寅自序曰漢河間獻王購書必錄古簡梁武及隋唐各帝金題玉躡錦質繡章破紙斷章取而華國天寶以後或進書得官亦知上篤好本朝太宗混一僞邦圖書皆聚然士民之間尙或藏者旣非寶鑑皆以世傳聞見浸多懼久廢忘因作寶章待訪錄以俟訪圖書使焉分目睹的聞兩類一爲五十四條一爲二十九條名言皆其平日論書之語雖於古人多所譏貶然其心得旣深所言運筆布格之法實能脫落蹊徑獨湊單

微爲書家之圭臬

宣和書譜二十卷畫譜二十卷

明刊本

袁淑六藏書

不著撰人嘉靖庚子楊慎有宣和書畫譜總序云博古圖南國
監有刻本而此書雖中祕亦缺余得之亡友許吉士稚仁轉寫
一帙傳播無絕升庵更有畫譜一序又有宣和庚子歲夏至日
題識不稱御製尙屬近古兩譜皆刊於滇中藏書家往往蓄此
缺彼茲則雙璧交輝可珍也有華亭顧谿翁藏顧世雒星橋子
金粟如來是後身古潭州袁卧雪廬收藏諸印

宣和書譜二十卷畫譜二十卷

明鈔本

前有嘉靖庚子楊慎書畫譜總序又題畫譜一序首列宣和庚
子夏至日序文而不加御製自是古本書譜相傳爲蔡京蔡卞
米芾所定衍極云大德壬寅延陵吳文貴和之哀集已足補館
臣之缺而此卷末云宣和書畫譜乃當時祕錄未嘗行世近好

古雅德之士始取以資攷訂往往更相傳寫譌舛滋甚余竊病之暇日博求善本與雅士參校十得八九遂鋟諸梓大德壬寅新日長至延陵吳文貴識又大德七年正月錢塘王芝後序云宣和書畫譜自宋南渡後不傳於江左士大夫罕見稱道及聖朝混一區宇其書盛行好事之家轉相謄寫中間品目其夥洵更遷徙往往散逸人間大德中年芝被徵至京師俾彙次祕府圖書遂獲盡窺金匱所藏古今妙迹山積雲湊誠前代之所未有而譜內舊物亦或在焉芝翻理之餘心駭目眩竊自慶幸明年竣事南歸適吳君和之刻二譜於梓余嘉其有志於古也因爲書於篇末此書謬謬旣多如能廣采他集與同志參校遂爲最善本矣後更有嘉靖四十五年岳西道人華復初兩識是吳文貴僅集各本而校刊非出其哀集也王先生後序尤可徵元時掌故况爲鄉先輩遺文乎

廣川書跋十卷

盧抱經校鈔本

宋廣川董道著

有紹興丁丑十月丙辰孤棻謹序云先君刻苦務學博極羣書必探討本原三代而上鐘磬鼎彝其款識在祕府若好事之家必宛轉求訪得之後以前代石刻亦託人傳摹墨本南渡鄉關隔絕先世所藏莫知在亡今所存得於煨燼之餘哀集在者旌爲十卷書跋六卷繕藏家廟別錄以示子孫書跋刻於楊升庵書跋惟毛氏刊行此慮召弓學士鈔自舊本細加校勘石鼓文十篇改尤不少有抱經堂寫校本武林盧文弨手校印

廣川書跋六卷

明刊本

鈕氏世學樓藏書

宋廣川董道著

楊升庵慎跋云舊在館閣日得其本與王舜卿共傳寫之惟成以來失去下三卷舜卿亦失去上三卷會於靜居復互錄爲全

適又有書跋六卷訪求未獲嘉靖壬寅東阜劉大謨序有會稽鈕氏世學樓圖籍倪爾猷圖書印岑氏圖書諸記

廣川書跋六卷

明鈔本

曹倦圃藏書

宋廣川董道著

前有劉大模序後缺楊慎跋白紙藍格自屬明鈔有橋李曹氏曹溶之印諸記

寶興齋法書贊二十八卷

舊鈔本

徐紫珊藏書

宋岳珂撰

是書以家所藏晉唐以至南宋前人墨蹟各系以跋而爲之贊末附鄂國傅家帖一卷則其祖父手蹟也世久無傳館臣採自永樂大典排比成書此傳錄本也有曾爲徐紫珊所藏潘氏桐西書屋之印潘某坡圖書印蟬隱介繁印信潘印志萬長壽碩庭所藏吳雲平齋曾讀過諸圖記

書小史十卷

影宋本

錢塘陳思纂次

是書以歷代書家小傳纂次成帙凡紀一卷自庖犧迄五季載帝王五十一家傳九卷首后妃十附以諸女十三次諸王二十七次蒼頡至郭忠恕共四百三十人咸淳丁卯天台謝愈修序云道人趣尚之雅編類之勤可謂不苟於用心每到中都必先來訪訂證名帖飽窺異書愈久而愈不相忘宋刊起卷六一至五毛氏影補之後歸百宋一屢今歸皕宋樓余從而影寫者

書苑精華二十卷

明鈔本

錢塘陳思纂次

所收凡一百六十餘篇集古人論書之語與書小史相輔而行魏鶴山題云古以書爲名如周官掌達書名於四方儀禮百名書於策則今所謂字也是故欲知學者必先識字不識字則無

以名物張顛草聖阿買八分猶爲不識字也臨安粥書人陳思
乃能集漢魏以後論書者爲一編曰書苑菁華豈不可尙雖然
是猶後世誇工鬪妍非吾所謂識字者若好學者又以此溯流
尋源以及於秦漢而上求古人所以名書之意則讀書爲文也
其庶乎是書白紙藍格的爲明人手筆惟闕魏序故補錄於右
有董氏仲籲印雲亭澹如等印

圖繪寶璽五卷補遺一卷

元至正丙午刻本

怡府舊藏

吳興夏文彥士良纂

前有會稽抱遺老人楊維禎手書序又至正乙巳秋文彥自序
錢遵王云書成於至正乙巳自吳晉至宋元歷代畫家名氏網
羅搜討殆徧序云他無所好獨於畫遇所適諦玩輒忘寢食其
留心畫史終身以之黃丕烈士禮居藏書題跋云津津所刻已
合明欽天監玉泉韓昂續纂者而并爲六卷又何論近刻之八

卷乎今觀此刻歎爲希有雖漫漶不可卒讀然五卷原書具在
後附補遺與他本附補遺於六卷後者面目已改豈不可寶有
安樂堂明善堂藏書印

書史會要九卷補遺一卷

明洪武刊本

馬思贊吳騫舊藏

南村處士陶宗儀九成著

前有洪武丙辰宗儀自序及江陰孫作撰南村先生傳洪武丙
辰四明鄭真後序并引用書目姓氏末有張氏昇遠寶賜朝陽
克宣職升職采林氏魯郊合貲敘梓題字有蘇閣南樓書籍海
昌馬思贊仲安一號漁村拜經樓吳氏藏書各印崇禎庚午朱
謀聖隱之續一卷有刊序此則在二百年以前矣

書史會要九卷補遺一卷

舊鈔本

南村處士陶宗儀九成著

洪武丙辰春天台陶宗儀自序自三皇五帝迄於宋元遼金凡

八卷書法爲九卷補遺爲一卷蓋朱隱之謀聖之續編一卷尙未附入也

畫苑補益一卷 明鈔本 朱竹垞汪魚亭藏書

萬曆十八年中秋新安詹景鳳序秣陵王元貞同校序謂王弼山得畫家諸小書十六種名曰畫苑走別有十五種曰補益一爲梁元帝山水松石格次爲唐王維山水訣荆浩山水賦宋李成山水訣郭熙林泉高致郭思山水論又紀藝宣和御撰雜評韓純全山水純全集李澄叟畫山水訣無名氏論畫山水歌李廌畫品元華光梅品李衍竹譜詳錄張退公墨竹記惟畫品朱筆註云見畫類不具錄間有朱筆校正之字有曝書亭珍藏朱彝尊印汪魚亭藏閱書諸印

珊瑚木難八卷 明鈔本

明朱存理撰

存理字性甫博雅工文終於布衣是書載所見書畫題跋其中詩文世所罕覩者亦備錄全篇每種各綴跋語凡所品題具有根據此舊鈔本有瓜繻外史章綬銜章荻溪荻溪章紫伯珍賞包子莊經眼諸印

珊瑚木難八卷

舊鈔本

吳郡朱存理性父集錄

朱彝尊詩話曰存理自少至老未嘗一日忘學問人有異書必從訪求以必得爲志所纂集凡數百卷江南通志元季明初吳南園何氏笠澤虞氏廬山陳氏書籍金石富甲海內繼其後者存理其尤也茲編悉載所見字畫題跋其卷中前人詩文世所罕覩者亦附錄焉惟書從無刊本轉相傳寫譌脫頗多卷末有崇禎辛巳顧渚記云文衡山二詩野航錄至三彭漫止或有事阻弗獲全書予偶翻衡山帖爲野航續完亦是一段勝事又崇

禎紀元王廣泣書於菽齋云此先君子病革時所購得書也廣
俟病小間輒奉以進先君摩挲手披覽命廣收藏遽棄不肖而
此遂爲遺書野航先生固有鐵網珊瑚手鈔巨帙而此書近得
之百穀王徵君家蓋卽鐵網初易稿也別以木難小異同耳自
朱先生沒書歸文衡山先生其仲子和州公復授王徵君百餘
年來又由先司理授小子廣敢不思所以毋辱是書者乎前爲
王藹士廣文所贈有湛廬藏書印

汪氏珊瑚網法書題跋二十四卷名書題跋二十四卷

精鈔本

明汪珂玉撰珂玉字玉水號樂卿徽州人寄籍嘉興官山東鹽
運使判官崇禎癸未天中節序法書跋於東雅堂左隅之漱六
齋云自幼趨庭見先荆翁所藏書畫心竊儀之壯而於交知間
得掌錄名蹟以至老積廿有餘帙雖海人網取珊瑚亦不過是
此皆前賢遺墨多未壽梓奚啻龍藏珍祕第未詮次聊爾剖鈔

凡名畫法書自晉唐以來準時酌取有不薄今人愛古人意各自成部而所書真蹟詩文後則石刻繼焉復搜載記收藏家爲書憑附以往哲名言爲書旨書品崇禎癸未嘉平序名畫於墨花閣右之韻石齋云王右丞論詩中有畫畫中有詩余一觀名圖卽披佳句歲月旣深硯穿囊綻不下所錄法書固重重鐵網乎豈如涪翁云日對古人法書名畫可撲面上三斗俗塵哉遂仍舊貫殿以畫繼書據訣法明窗淨几有坐卧之安高堂素壁無卷舒之勞而人物禽魚之變幻山川草卉之奇姿燦然雜陳亦好事者之一適也况古人筆墨留縑素者傳之有限登簡冊者垂之無窮得以備攷訂存鑒戒窮神變測幽微張彥遠所謂與六籍同功四時並運豈漫無所關係耶右精鈔本凡卅二冊

珊瑚網四十八卷

舊鈔小字本

珂玉著古今躋畧又著霞上緒言其尊人愛荆與禾中項元汴

友善築凝霞閣以儲書畫縑細粉墨富甲東南崇禎癸未珂玉荷萃所藏分勒巨編前載題跋後附論說較之張青父清河書畫舫各錄綱目秩然矣

潞藩新刻述古書法纂十卷 明刊本

是書爲明潞王朱常芳撰常芳字敬一穆宗之後前有自序云述古書法纂者乃學書之暇隨筆集錄事皆雜出語次不倫聊以適志非敢學古時崇禎丙子七夕日潞國敬一主人中和甫識一曰書制源流二歷朝書體三名書形勢四名筆書法五名賢書論六名家學書七古書法帖八名書姓氏九書學須知十纂古書志按書志中記有崇禎癸酉春日方臨帖興酣而忽報流警一時數至雖未閣筆而想見小民焚掠之苦因爲口號曰喜見春光暄麗日忽驚烽火暗煙塵可憐鐵馬金戈下多少焦頭爛額人崇禎丙子距甲申僅八載乙酉南都破王在杭州獻

城降民稱潞佛子此書流傳甚稀可與路琴虎跑泉石上刻蘭花同傳故事矣

書畫題跋記十二卷續記十二卷

精鈔本

汪季青藏書

構李郁逢慶叔遇甫編

逢慶別號水西道人嘗據所見書畫錄其題跋分前續兩集雖不甚辨別真贋而採摭繁富究可爲伐山取玉披沙揀金之助每卷末有崇禎甲戌仲冬三日暢敘堂藏一條殆叔遇自識者歟此本鈔寫精工不媿書畫記之目耳有古香樓休甯汪季青家藏書籍汪氏柯庭校正圖書載德堂圖書記諸印

苦瓜和尚畫語錄一卷大滌子題畫詩跋一卷

精鈔本

汪穉辰藏

和尚廣西梧州人前朝靖藩裔也國亡薙髮爲比丘名原濟字百濤號苦瓜又自號瞎尊者或問曰師雙目炯炯何自稱曰瞎答曰吾日遇阿堵則盲然非瞎而何遍遊瀟湘洞庭匡廬鍾阜

天都太行五岳四瀆而畫益進書益工畫語十八章江陰陳鼎爲之傳張沆跋其後此之宋趙王孫彝齋卷勺亭主汪繹辰從周晚菰處檢得寫傳楷書尤極精工記印累累有孫輔元一印始賞鑒時鈴也苦瓜和尚語錄刊於知不足齋叢書題畫詩跋則繹辰所輯也繹辰字陳也來泰子仁和諸生託業於醫亦工八法輔元字備之號尋雲仁和貢生亦壽松堂主人也

書畫記六卷

精鈔本

鳴野山房藏書

徽州吳其貞撰

其貞字公一精賞鑒盛交遊家藏書畫之外嘗就蘇杭維揚諸家遇有真蹟品題劄記於行款方幅大小尺寸印記紙絹裝潢卷軸詳列賅博惟不錄前人題跋耳始自崇禎初年至本朝康熙十餘年方克成書有鳴野山房印

吳越所見書畫錄六卷

精鈔本

鳴野山房藏書

婁東陸時化編輯

時化號聽松山人乾隆丙申夏自序云於越余祖宗邱墓之鄉也至宋渭南公益著又八世遷吳前明參政孟昭公侍御晉川公復以文章事業顯於吳會垂而至大父匪莪公世次秩然遺經在笥未嘗失墜余不肖思追述先人緒餘山與水余先子之所好也尋先子之舊游不出吳越游歷久之故家遺族高僧韻士稍稍有出書畫相示者凡有所得如探珠拾翠必記其尺寸絹楮題款以歸藏之積有歲月竟成一編名之曰吳越所見書畫錄雖不能繼先人之業亦不失先人之好好之而已著凡例十四條及書畫說錦二十九條終之以書畫作僞日奇論一篇前有乾隆丁酉馮偉王成序題

鳴野山房書畫記三卷

原稿本

山陰沈啟溶撰啟溶收藏舊書頗似南宋之陳芸居此記其所

藏所見元明諸賢真蹟詳其行款位置方幅大小卷軸長短及印記紙絹并附攷證山陰晁志列其目

右藝術類書畫之屬

新刻文會堂琴譜六卷

明刊本

錢塘全菴胡文煥德甫選輯

前有自序云此譜皆親傳之浙操順暢而雅正潔淨而精當既未經梓遂拔其尤其間首自創制末附鄙私共分一十八條一曰制度總規二曰取材三曰打絃四曰修整五曰收藏六曰博攷七曰歷來琴式八曰鼓琴事法九曰宜忌雜數十曰鼓琴果事十一曰音律槩論十二曰調名十三曰曲名十四曰指法字譜十五曰手勢十六曰聖賢名錄十七曰琴操十八曰全菴附贅終之以嶧陽居士傳文煥賣書求生嘗刻格致叢書此則萬厯丙申所序刊也四明張綸允言撰後序

藏書志卷十七

三

右藝術類琴譜之屬

印史五卷

明刊本 黃文僖公藏書

古吳何通不遑甫著

此書所刻自秦始皇至哀平新莽二百二十六人漢光武至漢獻帝二百六人三國六朝一百八十三人唐太宗至後五代一百八十九人宋太祖至元順帝一百三十五人人各一印而各繫其字履官爵事實於下方前有萬曆癸亥初夏雲間陳本以三甫撰七古一篇以代序文後有通隱居士題跋館臣謂棄取不諳史法摹刻不諳篆法要惟備文品之雅玩耳有黃機私印澂齋二印機字次辰錢塘人順治丁亥進士官至文華殿大學士 贈太傅諡文僖

右藝術類篆刻之屬

碁經一卷碁訣一卷

舊鈔本

碁經爲碁局得算權輿合戰虛實自知審局度情斜正洞微名
數品格雜說凡十三篇宋晏天章撰前有張靖序後有無名氏
跋云自宋以弈顯名天下者昔年待詔老劉宗今日劉仲甫楊
中隱王琬孫仇郭範李百祥輩皆能誦此十三篇體其常而生
其變當爲南宋初人矣碁訣凡四章曰布置曰侵陵曰用戰曰
取舍宋劉仲甫撰仲甫錢塘人南渡時國手自序曰碁者意同
於用兵敘此四篇粗合孫吳之法後附雜說卽注晏天章碁經
之末篇也按錢遵王讀書敏求記載有宋槧李逸民碁譜二卷
前爲御書院棋待詔賜緋李逸民重編逸民云我朝善弈顯名
天下者昔年待詔老劉宗今日劉仲甫楊王孫郭李云云豈碁
經無名氏跋卽李逸民所爲歟

壺譜一卷

明嘉靖刊本

讀書敏求記投壺譜一卷不著撰人但云自溫公易新格而古

之投壺譜式皆不存此自有初以至例耳著明賞罰之筭蓋取
禮記投壺之禮爲證焉 四庫存目壺譜一卷明李孝元撰孝
元字松橋滑縣人嘉靖中官都司經歷其書以投壺之法圖之
爲譜凡十八目一百三十餘式雖非禮經古制亦技藝之一種
此本目十八圖一百三十二與存目所言合惟不著孝元之名
前後有嘉靖壬戌長安石峯王彙征虞泉楊泉兩序亦不言李
氏所撰何耶

右藝術類雜技之屬

善本書室藏書志卷十七終

善本書室藏書志卷十八

錢塘丁丙松生甫輯

子部九上

古今刀劍錄一卷 明華氏刊本

梁華陽道士陶宏景撰

自序云夫刀劍之由出已久矣前王後帝莫不鑄之但以小事
記注者不甚詳錄遂使精奇挺異空成堙沒慨然有想遂爲記
云凡記帝王刀劍自夏啟至梁武帝四十事諸國刀劍自劉淵
至赫連勃勃十八事吳將刀周瑜以下十事魏將刀鍾會以下
六事然關張諸葛黃忠皆蜀將不應附入吳將中疑傳寫誤脫
蜀將刀標題又董卓袁紹不應附魏亦不應在鄧艾郭淮之間
均爲顛舛 四庫提要謂其眞僞參半有以也

至大重修宣和博古圖錄三十卷

明嘉靖翻本

豐道生藏書

前有嘉靖七年樂安蔣賜序曰宣和收錄其志恐專爲器焉噫
爲器則敝矣予苦是籍艱於好古者爰屬掌監司者黃君景星
翻刊之若曰玩物喪志則予不敢錢遵王所藏是至大刊本謂
凡臣王黼云云都爲削去殆以人廢言歟所謂宣和博古圖者
乃徽宗禁中有宣和殿以藏古器非宣和年所編也其圖狀當
時鍾李公麟所作字法俱撫歐陽雕造精工洵爲攷古之資卷
端有豐府藏書一印頗古劫後得於甬上豈攷功之遺籍乎

燕几圖一卷

明刊本

前列紹熙甲寅雲林居士黃長睿伯思自序謂燕几者圖几之
制也初几有六列等惟三以几長七尺者二長五尺二寸五分
者二長三尺五寸者二皆廣一尺七寸五分高二尺八寸縱橫
錯綜而列之爲二十體變爲四十名因體定名因名取義謂之
散子桌取六數也未陽宣谷卿增一小者合而爲七嘉其善變

而適用易名七星元陶宗儀刻入說郛後頗獨癡叟陳植叔方
識云圖得於沈君仲說錄之以傳好事又宏治甲子葑門邢參
題云吾鄉王仲遠洪武永樂間人喜繕寫書雖文移案牘莫不
鈔之此圖亦所鈔者也其子敏道能保手澤近朱性獲其鈔本
吾友沈潤卿摹刻於棗可謂博雅之一端案潤卿名津蘇州人
先世業醫正德中選入太醫院津自著鄧尉山志吏隱錄

文房四譜五卷

吳枚菴校鈔本 省心齋戴氏藏書

翰林學士蘇易簡集

一二卷筆三卷硯四卷紙五卷墨每譜皆一敘事二造三雜說
四辭惟筆譜多一筆勢耳前爲東海徐鉉序後易簡自序趙清
常錢東潤先後詳校朱文游從趙錢本錄出吳枚菴又從朱本
復校後歸黃義圃有跋戴松門光曾更從吳本錄副手記云是
書爲枚菴一生精力所在允推枕祕有從好齋嘉興戴光曾鑒

藏經籍書畫印諸記

文房圖贊一卷續一卷

明刊本

前書有嘉熙初元和靖七世孫可山林洪龍發自序云士之仕
皆繇文房始惟唐韓愈舉穎爲中書他竟無所聞今圖贊十一
八人擬以官酬之俟異日請於朝罔俾昌黎顧美有唐後有正
德丁卯吳下祝允明序續圖贊爲寶祐二載秋浦雪江子羅先
登瑞卿所撰自序云可山林君文房圖贊一十八人可謂盡錄
善庸藝之美矣一日有友以十夫來獻曰此文房中之未見知
者豈可山舉人之未周乎否則未之思耳敬續引以進償其爵
圖且贊庶幾乎雲臺四七之盛云元統二年雪舟樊士寬又序
後有長洲沈周題云宋林洪紀文房通用之器十八類後羅先
登續之又十八類各繫以職官名號圖像爲贊託之史事隱然
寓褒貶深意沈澗卿刻之以傳

硯史一卷 明覆宋本

襄陽米芾

自序云人好萬殊而以甚同爲公甚不同爲惑喻之而移非眞得之更而得則必信其守夫博弈由賢乎已則吾是文必有嗤於賞鑒之士首用品論石以發墨爲上附性品論石之堅軟次樣品則列晉唐迄宋形製之殊中紀諸硯凡二十六種於端歙辨之尤詳

硯譜一卷 明華氏刊本

不著撰人姓名前後亦無序跋譜中雜錄出產故實間載歐陽修蘇軾唐詢鄭樵諸人之說則南宋人所爲

歙硯說一卷辨歙石說一卷 明刊本

不著撰人名氏百川學海列於歙州硯譜後卷末有紹興三十年十二月弟左承議郎尙書禮部員外郎兼國史院編修官邁

跋有云景伯兄治歙期年能納其民於不忍欺之鄉斷獄廷下至無一迹獨念翰墨眾君子乘集吾土而主人莫之省旣揭蘇氏文房譜於四寶堂又別刻硯說三種以書來令綴語其下是此二說與唐積譜皆洪适所刻硯說兼紀采石之地琢石之法及其品質高下歙石說則專論紋理星暈凡二十七種辨別頗詳

端溪硯譜一卷 明華氏刊本

不著撰人姓名卷末有右縉雲葉樾交叔傳此譜稍異於眾人之說不知何人所撰稱嶽祖爲太上皇必紹興初人云淳熙十年七月二十四日東平榮芑書譜首論石之所出與石質石眼次論價次論形製而終以石病皆剖析詳至足以依據卷端有崇福禪寺木記寺在錢塘大雄山殆爲好事僧伽藏弄歟

歙州硯譜一卷 明刊本

卷末有大宋治平丙午歲重九日十字書錄解題有歛硯圖譜一卷太子中舍知婺源縣唐積撰治平丙午歲云云年時正合是當爲積撰一採發二石坑三攻取四品目五修斲六名狀七石病八道路九匠手十攻器惟書錄解題作圖譜此則僅有譜而已

墨數一卷 舊鈔本

唐韋續纂

案晁公武讀書志爲高陽許歸與編未詳何代人陳振孫書錄解題則云不知何代所集十八篇又一本二十一篇此本是也續不知何人明程榮昔梓此書分上下二卷今祇一卷其在未分以前之本與

冠譜一卷 舊鈔本

四庫存目云顧孟容撰孟容錢塘人書載歷代冠製每冠繪之

爲圖前有永樂甲辰端月奉議大夫刑部員外吳郡尤芳序稱
武陵顧孟容多藝能凡所製之冠必遵古法持譜乞序其首雖
所圖未必盡合於古亦足以備參攷之資

野服攷一卷

明鈔本

前攝朱明洞天仙史張丑纂

是編鴻搜故牘擇野服之尤雅者凡十六條如臺笠縑素鹿裘
帶索鷗冠幘鼻褌不借白笠羅草裳短褐聚芳圖百花帶隱士
衫樹衣芒屨九華半臂青笠綠蓑飛雲履減樣方平帽太清蹻
各注釋其下爲張氏藏書十種所未收

汝水巾譜一卷

明刊本

查恂叔藏書

崇禎癸酉南郡汝水居士朱術垌自序凡述古巾製式三十有
二各綴圖說洵服飾之雅譚也姑蘇陸廣明題後 四庫入存
自有宛平查氏藏書印古燕查氏家藏宛平查禮恂叔氏圖書

諸印禮蓋爲仁之弟也禮字恂叔號儉堂順天宛平人乾隆丙辰薦舉博學鴻詞官至湖南巡撫

香譜二卷

明華氏刊本

譜分四類曰香之品香之異香之事香之法不著撰人百川學海題爲宋洪芻撰提要辨其非沈立所譜久不傳書錄解題有侯氏萱堂譜或卽其書耶

右譜錄類器物之屬

茶經三卷

明華氏刊本

崇福寺藏書

竟陵陸羽撰

羽字鴻漸一名疾字季疵號桑苎翁竟陵人隱於苕溪徵不就仕列唐書隱逸傳著茶經三篇藝文志載之分十類曰一之源二之具三之造四之器五之煮六之飲七之事八之出九之略十之圖其曰具者皆採製之用其曰器者皆煎飲之用其曰圖

者乃謂統上九類寫以絹素張之非別有圖其類十其文實九
也有崇福禪寺小木記寺在吾杭艮山門

茶經三卷附錄一卷茶譜一卷外集一卷

明刊本

茶經唐竟陵陸羽鴻漸著明新安汪士賢校茶譜明新安汪士賢
校

茶經前有宋陳師道序茶譜不載撰人姓名士賢合而刻之槧
印精工書帕本中之佳刻也

茶經三卷附一卷

明刊本

汪魚亭藏書

唐竟陵陸羽鴻漸撰明新都孫大綬校梓

萬厯戊子十嶽山人王寅序云吾郡孫伯符者有茶癖以爲作
聖迺始於羽檢所藏本附茶具圖贊集梓以傳前列宋陳師道
序唐皮日休茶中雜詠序陸羽傳附以張又新茶經水辨歐陽
修大明水記浮槎山水記外集孫大綬編茶詩版心有秋水齋

三字卷前有風塵俠氣海山仙蹤木印汪魚亭藏閱書朱印

茶錄一卷

明覆宋本

朝奉郎右正言同修起居注臣蔡襄上進

前有襄自序陸羽茶經不第建安之品丁謂茶圖獨論採造之方至於烹試曾未有聞臣輒條數事簡而易明勒成二篇名曰茶錄上篇論茶下篇論器並有治平元年五月襄有後序

宣和北苑貢茶錄一卷附北苑別錄一卷

舊鈔本 蕭山汪氏藏書

宋熊蕃撰別錄宋趙汝礪撰

錄中所論皆建安茶園採焙入貢法式淳熙中其子校書郎克始登之梓并補圖三十有八附採茶詩十章克卽撰中興小記者也時福建轉運使主管帳司趙汝礪後作別錄以補未備嘉慶庚申蕭山汪繼壕後記云熊趙兩錄附宗儀說郭曾載之於別錄則題宋無名氏家君傳 四庫寫本熊錄有圖有注別錄

有汝礪後序遠勝陶本然說郭貢茶於諸目下皆注分寸則爲寫本所無別錄麤色第六綱內之大鳳茶小鳳茶二條寫本亦失去因取二本互勘之繼據爲龍莊先生之子家有環碧山房藏書頗富

東溪試茶錄一卷

明華氏刊本

宋子安集

晁公武作朱子安左圭作朱子安與宋藝文志合晁志當傳寫之譌東溪屬建安地書分八日曰總敘名曰北苑曰婺源曰佛嶺曰沙溪曰茶名曰採茶曰茶病大要以品茶宜辨所產之地雖相去咫尺而優劣頓殊故錄中於諸焙道里遠近最爲詳盡

茶經一卷

明鈔本

萬曆丙申春遽覺生張謙德自序云古今論茶事者無慮數十家若鴻漸之經君謨之錄可謂善美矣第其時法用熟碾細羅

爲九爲挺今世不爾故烹試之法不能盡與時合適於暇日折衷諸書附益新意勒成三篇借名茶經授諸東而就正博雅之士上篇論茶中篇論器此在張氏藏書十種之中

煎茶小記一卷

明華氏刊本

江州刺史張又新

又新字孔昭深州陸澤人事蹟具新唐書本傳其書前列刑部侍郎劉伯芻所品七水次列陸羽所品二十水後附葉清臣述煮茶泉品一篇歐陽修大明水記浮槎山水記各一篇

茶譜前集

明刊本

萬曆癸丑鼓山主人洪州喻政自序謂與徐興公廣羅古今之精於譚茶若棘事及之者合十餘種爲茶書西陵周之夫序曰喻正之不甚嗜茶而澹清真雅合茶理方其在留京爲司馬曹郎握庫堯鑰盡以其例羨付之殺青所刊正諸史志辨訂魚豕

藏書志卷十八

七

列在學宮人士直將尸而祝之今來福州復取古人談茶十七種合爲茶書正之雖非茶癖抑誠書淫矣吾安謝肇淪亦爲序凡彙刻唐陸羽茶經宋蔡襄茶錄宋朱子安東溪試茶錄宋熊蕃北院貢茶錄宋熊克北苑別錄宋黃儒品茶要錄明顧元慶茶譜茅一相茶具圖贊陸樹聲茶寮記宋陶穀荈茗錄唐張又新煎茶水記明徐獻忠水晶唐蘇廙湯品明陳繼儒茶話明屠本峻茗笈又品藻田藝蘅煮泉小品明張源茶錄明陳師茶攷明屠隆茶說明許次紆茶疏明羅廩茶解明龍膺茶史明徐渤別紀茶譚明喻政茶集附唐寅烹茶圖集誠茗事之大觀也

陽羨茗壺系一卷洞山芥茶品一卷

盧抱經精鈔本

江陰周高起伯高著

前有小引云壺於茶具用處一耳而瑞草名泉性情攸寄寶仙子之洞天福地梵王之香海蓮邦審厥尙焉非曰好事已也故

茶至明代不復碾屑和香藥製團餅此已遠過古人近百年中
壺黜銀錫及閩豫蓋而尙宜興陶又近人遠過前人處也陶易
取諸取諸其製以本山土砂爲之能發茶之眞色香味不但杜
工部云傾銀注玉驚人眼高流務以免俗也至名手所作一壺
重不踰數兩而價重每一二十金能使土與黃金爭價世日趨
華抑足慨矣因攷陶工陶土而爲之系一創始二正始三大家
四名家五雅流六神品七別派附詩四篇洞山界茶品凡四品
又不入品又貢茶并自序均爲抱經堂鈔本末有盧學士朱筆
紀云蜀山曾一至入夜望四山皆火光也製者多而佳者少矣
甲午十一月四日磯漁書

酒譜一卷

明刊本

寶千野

子野名萃汶上人晁公武稱其學問精博著有新書音訓四卷

其書雜敘酒之故事凡十五條始於酒名終於酒令首尾已具
與宋志一卷合

酒史六卷續六卷

朱印本

無懷山人編次續集午橋釣叟編次

此書四庫入存目無懷山人者乃馮時化別號也時化字應龍
號與川不著其里籍其書分酒系酒品酒獻酒述酒餘酒攷皆
酒之詩文故實也前有隆慶庚申趙惟卿序而浙江採遺書錄
又稱酒史六卷爲徐渭撰此本前無趙惟卿序而有萬曆乙卯
趙南星序稱外舅柏卿馮公自號無懷山人博學能詩古文詞
數千有司不收遂自覆於酒作四時小逃世詩常與飲者曰稽
公公之外舅也曰趙公與公同學者也久之趙公成進士爲官
去公益廓落時與諸公飲暇述古來釀酒之事及酒人爲酒史
六篇傳於世史爲趙公所刻版藏公家公之子曰叔開季壯孫

繼之以其字漸磨滅將重刻而爲之序微此序不能見時化之籍柏鄉人也又續編六卷題午橋釣叟次編爲康熙間人

飲膳正要三卷

彰元鈔本

前有天曆三年三月三日飲膳太醫臣忽思慧進上表文是年五月朔奎章閣侍書學士翰林直學士中奉大夫知制誥同修國史臣虞集謹序又編集諸臣銜名又有無名氏一序而宋樓有元刊元印本此則影寫也

右譜錄類食譜之屬

揚州瓊華集一卷

明成化刊本

明楊端撰字惟正鄞縣人成化間寓揚州採摭前人瓊花篇什彙爲一編以備故實也前有自序及瓊華圖讀書敏求記亦經著錄 四庫存目提要謂錢遵王衍一木字檢敏求記謂楊端采輯當時館臣所見采輯之采訛作木字故疑爲衍文校誤之

蘇書三卷十一
難真如掃葉留青日札云南宋宦者陳源取瓊花孫枝接於聚
八仙根上至今流傳杭州瓊花園是也按嘉靖仁和志忠清里
舊名瓊花街寒家實居是里偶一展卷覺意蕊心花都爲舒放
豈僅如遵王之謂如枯樹回春哉

洛陽牡丹記一卷

明刊本

廬陵歐陽修述

是記凡三篇一曰花品敘所列凡二十四種二曰花釋名述花
名之所自來三曰風俗記首略敘遊宴及貢花餘皆接植栽灌
之事文格古雅有法蔡襄嘗書而刻之以拓本遺修修自爲跋
已編入文忠全集此則單行本也

揚州芍藥譜一卷

明翻宋本

將仕郎守大理寺丞知揚州江都縣事王觀撰

前有自序後有自論觀字達叟如皋人熙甯中任江都令上揚

州賦蒙賜緋衣銀章揚州芍藥宋初名於天下宋藝文志載爲之譜者三家一孔平仲一劉放一卽觀觀因劉譜所列三十一種改其一種增其八種特敘述較詳此本翻宋時刊本不減天水原槧

菊譜一卷 明覆宋本

越城劉蒙

蒙於崇熙甲申爲龍門之遊訪劉元孫所居相與訂論爲此譜蓋徽宗時也

范村菊譜一卷 明翻宋本

石湖范成大

前載自序月令以動植氣候如桃桐華直云始華至菊獨曰菊有黃華豈以正色獨立不伍眾草變詞而言之歟故名勝之士未有不愛菊者至陶淵明尤甚愛之而菊名益重頃見東陽人

家圖多至七十種淳熙丙午范村所植止三十六種悉爲譜之
明年將訪求他品爲後譜云蓋其以資政殿學士領宮祠家居
時所作凡黃者十六種白者十五種雜色四種尙闕其一疑傳
寫者有所脫也

海棠譜三卷

明翻宋本

錢塘陳思

上卷敘事中卷詩上下卷詩下開慶改元長至日自敘曰梅花
占於春前牡丹殿於春後騷人墨客特注意焉獨海棠風資豔
質固不在二花下自杜陵人蜀絕吟於是花世因薄之其後都
官已爲舉似本朝列聖品題此花始得顯聞於時今採諸家雜
錄及唐以來諸人諸句以爲一編曰曰海棠譜殆當日睦親坊
書棚所梓者也

餅花譜一卷

明鈔本

夢蝶齋徒張謙德著

此亦張氏藏書十種之一而當時別有刊本故 四庫又收譜錄類存目并謂是書首品瓶次品花以及折技插貯等事而終以護瓶據其自序蓋稱齋所作

荔枝譜一卷 明華氏刊本

莆陽蔡襄述

是編爲閩中荔枝而作凡七篇一原本始二標尤異三誌賈鬻四明服食五慎護養六時制法七別種類襄嘗手寫刻之今尙有墨版流傳此則刊之書林耳

橘錄三卷 明刊本

前有淳熙十五年十月延安韓彥直自序云去秋把麾來此得一親見花而再食其實以爲幸獨故事太守不得出城遠游無因領客入泥山香林中泛酒其下而客乃遣予泥山耆且曰橘

之美不減荔子荔子今有譜得與牡丹芍藥並行而獨未有橘譜子愛橘甚橘若有待於子不可以辭子因爲之譜上卷載柑品八橙品一中卷載橘品十八以泥山乳柑爲第一下卷則言種植之法皆詳贈可觀彥直字子溫新忠武王世忠長子事蹟具宋史世忠傳吾杭飛來峯翠微亭有彥直題記

竹譜一卷

明翻宋本

晉武昌戴凱之慶豫撰

所記竹類七十餘種以四言韻語記竹之種類而自爲之注文皆古雅

筍譜一卷

明華氏刊本

吳僧贊甯撰

前有譜目一之名二之出三之食四之事五之說蓋仿陸羽茶經也晁公武作僧惠崇撰然不聞作是譜陳振孫謂贊甯撰與

宋藝文志合贊甯出家杭州龍興寺吳越王錢氏署爲兩浙僧
統宋至道二年卒謚曰圓明大師

菌譜一卷

明履宋刊本

前有淳祐乙巳秋九月陳仁玉自序云仙居介台栝叢山入天
仙靈所宮爰產異菌林居巖棲者左右芼之固藜莧之至腴蕁
葵之上瑞比或以羞王公登玉食自有此山卽有此菌未有此
遇也遇不遇無預菌事緊欲盡菌之性而究其用第其品作菌
譜凡十一種各詳其所生之地所採之時與其形狀色味仁玉
字碧棲擢進士官浙東提舉入直敷文閣

師曠禽經一卷

明華氏刊本

晉太傅張華注

陸佃埤雅始稱師曠所撰張華注則左圭所表其實皆僞託也
南宋之末已經流傳雖僞亦古矣

蟹譜二卷 明華氏刊本

怪山傅肱子翼

陳振孫書錄解題怪山乃越州之飛來山肱則會稽人也前有嘉祐四年自序並總論二篇上卷多采舊文中引唐韻十七條尤足備攷證下卷則其所自記首列杭俗鄙食蟹時有田彥升家於半道紅幼性孝其母嗜蟹彥升慮爲比鄰闕笑常遠市於蘇湖間以布囊負歸俄而楊行密將田頔兵累至鄉人皆竄避糧不接多餒死獨彥升挈囊負母竟以解免時人謂之孝報可爲吾鄉掌故矣

異魚圖贊四卷 精鈔本

楊慎升庵撰

前有自引凡魚圖三卷贊八十六首異魚八十七種附以海錯一卷贊三十首海物三十五種亦頗古雋與宋祁益都方物略

可以讀顧前有萬曆戊申范允臨題記此帙尾題乾隆丙戌五月二十九日鈔畢是日梅雨初晴池水滿陂天光倒影澈見底游魚出沒三三五五歷歷可數又朱印曰稼芟手鈔并校書借精妙惜不知姓氏又有東南山中人一印

硃砂魚譜一卷

明鈔本

烟波釣徒裔孫謙德撰

前自序云余無他嗜獨喜汲清泉養硃砂魚時時觀其出沒之趣久而聞見浸多餌飼益諳暇日敘其容質與愛養之理輒條數事與同志共之上篇敘容質十條下篇序愛養十條此又在張氏藏書十種之外有照四十七世孫當湖鮑氏豐珍藏書畫祕笈之印

蟲天志十卷

明刊本

吳淞非磊落氏沈宏正撰

宏正嘉定人志分六部一曰關二曰舞三曰能言四曰傳書五曰識字六曰奏技各引鳥獸蟲魚舊事類列之取莊子惟蟲能蟲惟蟲能天之語名其書又以韓生注爾雅蟲魚非磊落人爲已號前列楊萬里林有鱗兩序有巢氏七研齋印陳寶晉守吾甫記二印

右諸錄類草木鳥獸蟲魚之屬

子部十

墨子十五卷 影寫本 黃蕘園藏書

黃蕘翁手跋云此影寫吳匏菴手鈔本墨子十五卷余從顧千里所借嚴氏芳椒堂藏本錄出卷中朱墨兩筆校改皆仍其舊是書本出吳郡不知何時轉入浙江今得此影鈔亦可爲中郎之似矣又跋云初余以此本爲吳文定手鈔憑張青父跋信之千里尙猶豫未決旣檢陸其清佳趣堂書目有云墨子十五卷

吳匏菴手錄張青父舊藏此更可信而有徵矣癸亥正月小晦
丕烈鈐有讀未見書齋收藏堯翁兩印惜缺卷一至卷五

子罕子二卷

明刊本

書首載劉向校定序凡十篇朱子謂其理多取佛老醫卜其字
多用左傳班史其粉飾塗澤俯仰態度類近時巧於模擬變換
者所爲決非先秦古書原其所自祇因家語有孔子與程子傾
蓋而語一事遂造爲此書以傳合之或云王銍姚寬多作贗書
而文非所及然明天啓間直隸順德府內邱令雷鳴時嘗披邑
志新其祠宇刻其書爲十卷有金之俊趙秉衡下魁楚方之翰
各序似確有其人也此爲郎兆玉點評蓋依吉藩本所刊並序
云漢藝文志略之隋唐宋志略之吳兢李淑二家又略之或未
經秦燔若欲納之灰燼中余何敢附和先儒而令羽翼經傳者
終致湮滅乃授之梓兆玉字完白仁和人萬厯癸丑進士官淮

安同知

尹文子一卷

明刊本

漢山陽仲長氏定

前有序曰尹文子者蓋出於周之尹氏齊宣王時居稷下與宋
鉞彭蒙田駢同學於公孫龍龍嘗稱之著書一篇多所彌綸云
云此本槧印尤精

鵠冠子三卷

盧抱經校聚珍本

宋陸佃解

乾隆己酉癸卯盧弓父兩次手校卷末有跋云聚珍版鵠冠子
博選篇樂嗟苦咄樂嗟苦三字本缺校者據他本補入案陸佃
注云樂則嗟之咄則苦之其語頗合然宋黃東發日鈔載此句
是謳籍譖咄也又王鈇篇家里用提注引公羊傳倪月校云一
本作提今本公羊傳亦無此文余案徐堅初學記晦日條下所

引正作提月又其罪有司而貳其家本注有其人爲首其家爲貳八字今本無之又參於兩間四字本注在天子執一以居中
央下今以爲正文天樞篇注引列子微有與動凡一本作某字
云云皆非陸農師所加其中頗有可刪者其精核若此與道藏
本何異哉

鬼谷子一卷外篇一卷 明刊本

前有監修國史趙國公長孫無忌等撰序直襲漢書藝文志語
當出依託又摘錄高似孫子略論鬼谷子語刪去陶貞白注篇
目下間引一二條蓋明人書帕本也寫刻頗工

鬼谷子三卷 鮑以文校鈔本

梁貞白先生丹陽陶弘景注

孫淵如編修讀道藏於華陰嶽廟時所錄本素編修敦夫敘而
刊之攷其篇曰補其逸文阮氏芸臺跋尾可稱精審鮑以文甲

寅九月寓兩廣會館又加校訂改正不少

呂氏春秋二十六卷

明翻元本

巡按直隸監察御史陳世寶訂正河南按察司僉事朱東光參補直隸鳳陽知府張登雲繙校

常熟瞿氏藏元至正間嘉興路總管劉貞得東牟王氏校本所刊每半葉十行行二十字序後有嘉興路儒學教授陳泰校吳興謝盛之刊一行有鄭元祐序鏡湖遺老跋陸存齋藏元刊本云與此同並云小字雙行版心有字數小黑口此本行數字數皆合卷首題孟春紀第一本生重己貴公去私次行題呂氏春秋訓解高氏宏治刊本卽同此式前有遂昌鄭元祐序總目後有鏡湖遺老記皆與元刊合惟前多姚江葉逢春序謂余友甯陽張君守中都而特梓是又天台方遜志讀呂氏春秋作後綴南雍舊有板刻蓋自元時歲久剝闕慮其廢逸急覓善本校補

之甲戌秋自微菴識高誘序後紙已割去攷 天祿琳琅明板
子部卽收此本云陳世寶朱東光爵里無攷張登雲山東兗州
府甯陽人隆慶辛未進士葉序甯陽張君者是也

呂氏春秋二十六卷

明宏治刊本

卷首第二行孟春紀第一本生重已貴公去私第三行呂氏春
秋訓解高氏此盧抱經云猶存古意者也前有遂昌鄭元祐序
序後有嘉興路儒學教授陳泰至正六年下關一行高誘序總
目後有鏡湖遺老記二十六卷末有宏治十一年秋河南開封
府許州重刊一條後序一篇闕尾葉殆畢尙書沅所謂李瀚本
瀚字叔淵號有齋沁水人成化辛丑進士官至戶部尙書此正
巡撫河南時重刊版心記大小字數世之所謂元刊者殆以此
本匿去後序割去宏治一行而爲之歟

呂氏春秋二十六卷

明嘉靖刊本

高氏訓解

前列高誘序總目後有鏡湖遺老記刻書者爲關中許宗魯東侯也畢秋帆尙書沅校刊所據舊本第三部卽此本注云從宋賀鑄舊校本出字多古體嘉靖七年刻

呂氏春秋二十六卷

明刊本

高氏訓解明雲間宋邦乂男宋啟明校

前有瑯琊王世貞撰序雲間莫是龍書序又有華亭宋啟明重刻序及高誘原序宋邦乂原有是刻范廷敞徐益孫何三畏同校此皆削去僅列男宋啟明一名耳盧抱經以李瀚本許宗魯本朱夢龍本校正

呂氏春秋二十六卷

明萬曆刊本

漢河東高誘訓解明新安汪一鶴重訂

前列高誘序方孝孺讀呂書後又萬曆乙巳季冬汪一鶴自序

謂屢求善本因得數種乃與友人鄭微仲參校付梓畢尙書沉
校刊所據本列此爲第五

呂氏春秋二十六卷

明刊本

仁和黃甫龍應侯父沈兆廷行諫父同訂

前列高誘序方孝孺題語繡水賀萬祚撰刻書序云余門人黃
應侯偕同社沈行諫於治經之外癖好是書不獨諷誦其文且
彙諸名公定評以付剞劂錢塘朱夢龍用霖識凡例云呂氏春
秋總二十六卷凡百六十篇餘杭鏤本亡三十篇而脫句漏字
合三萬餘言元豐初取太清樓藏本詔修於資善堂先秦祕寶
獲不墜地茲集喜得宋本因鳩工梓之呂子一書高似孫以爲
居諸子之右歷來名公固有評點但載在散帙而未集大全余
彙擇先輩名公定評搜其剔旨提綱者用鼓吹焉評爲王世貞
茅坤邱瓊陳深楊慎劉辰翁穆文熙歸有光方孝孺王鏊張榜

眞德秀黃震汪道昆董份唐順之瞿景淳錢福余有丁楊維禎
焦竑許國楊士奇孫應龍蘇洵王懋王士性凌約言鮑彪二十
餘家尤足爲讀書之先導呂覽雕本甚多重以鄉先哲所梓特
存之

淮南鴻烈解二十八卷明刊小字本

太尉祭酒臣許慎

前有河東高誘撰序萬曆壬午歸安茅一桂序云彙藏經鈔本
參相校讐攬撫經傳而鑲諸木又虎踞山人陳大順序並總評
三葉按士禮居藏書題跋淮南子有二本一爲二十一卷出於
宋本一爲二十八卷出於道藏此葉半葉十二行行二十五字
原道似眞天文地形時則主術汎論七篇分爲上下故增七卷
世稱莊烱刻本出於道藏而高注脫落正文譌舛不一而足此
較莊本佳處實多與士禮居舊校宋本照合者十之八九眞鴻

烈之善本矣

淮南鴻烈解二十八卷

明刊本

漢太尉祭酒許慎記上後學劉績補注後學王溥較刊

分卷與道藏本同前爲高誘舊序後有宏治辛酉蘆泉劉績識
曰淮南一書乃全取文子呂覽莊列鄧析慎子山海經爾雅諸
書乃當時所召賓客之言故文駁事舛漢許慎記上而高誘爲
之注記上猶言標題進呈也先儒誤爲慎注又疑非誘注按注
中云誘不敏則爲誘注明矣舊本殘謫自誘注時已不能辨如
以禁苛爲奈何之類甚多暇據他書補數千字改正數百字刪
去百字疑者仍存難釋者草草書數語釋之半葉九行行十七
字

淮南子二十一卷

莊刻校北宋本

漢涿郡高誘注

道光十四年長洲陳奐記云北宋淮南書二十一卷此最善本也舊藏黃主政士禮居後歸山塘汪氏高郵王尚書借鈔字多漫漶歸對不易顧澗濱曾有影鈔本稱甚精核胡君雨塘得之卽士禮居舊藏本今向雨塘借校重睹至寶又爲蘭鄰先生禮屬代校一過其不同處悉書於字側而并箸行款如宋孰得孰失必有能辨之者矣同治十年續溪胡澍記云淮南世傳莊校爲善然勘以諸舊刻知多出臆改爰閱陳碩甫徵君有校北宋本心竊豔之無緣見同年趙樞叔謁選入都攜以見示仍用莊本校錄之如是而淮南之真面目得復見矣宋本每葉廿四行每行廿二字行中字形不齊等今校葉行眉目每半葉用一全葉用一并記葉數

淮南鴻烈解二十一卷

明刊本

陶石簣藏書

漢河東高誘注歸安鹿門茅坤批評

臨海王宗沐序曰鹿門從子一桂故嗜書業已訂淮南編烈解行海內而鹿門子猶病其略載所批評讀之句若櫛字若縷不啻左右廣而導之前茅也眉間刻批纍纍卷前有記云每冊有少微山房印乃祁忠惠公越中國亭之榜又有陶顒之印第五卷有石簀山房印此乃陶文簡公硃藍筆評校公號石簀會稽人萬曆乙酉鄉試第二已丑會試第一殿試一甲三名授編修與弟君爽終日論學得奇書共讀之此眞書苑瓊寶

淮南天文訓補注二卷

精鈔本

陳仲魚藏書

漢太尉祭酒臣許慎記上後學錢塘綴述

漑亭旣成進士請改教授南歸著書此其一也前題臣慎記上者從道藏本也班生謂道家本出史官蓋天文之學本諸馮相原非異術叔重之注淮南存於道藏固宜漑亭於高許二家之後引伸觸類可以上窺渾蓋宣夜之原旁究堪輿叢辰之應矣

藏書志卷十八

十九

前有錢竹汀學士謝金坡侍郎翁覃溪學士序跋海甯陳鍾觀仲魚圖象得此書費辛苦後之人其鑒我諸印

人物志三卷

明刊本

魏散騎常侍劉邵撰涼儒林祭酒劉昺注

上卷九徵體別流業材理中卷材能利害接識英雄八觀下卷七繆效難釋爭凡十二篇前有阮逸序後有王三省文寬夫題識廣平宋庠取邵昺二人本傳刪取其要爲記萬歷甲申河間劉用霖隆慶壬申鄭日文舊版里修不知卽此否也又藏有小字本卷面有姚若再洲題云九徵篇云簡暢而明矻簡是簡暢是暢明是明矻是矻簡暢謂簡而暢明矻謂明而矻涼劉昺註謂簡而不暢則滯明而不矻則翳是也文寬夫云明矻都無義自東晉諸公草書啟字近矻疑謂簡暢而明啟若按體別篇云矻清激濁不得謂啟清激濁利害篇云其道廉而且矻不得謂

其道廉而且敢接識篇云故能識訶砭之明不得謂故能識訶
啟之明古書不可妄改豈虛語哉

劉子十卷

明萬曆刊本

王謨士藏書

播州錄事參軍袁孝政註

北史儒林傳劉晝字孔昭渤海人嘗著帝道金箱壁言未及此
著故世謂爲劉勰又爲劉歆劉孝標皆非也吉藩刊本及子彙
本直謂晝撰凡五十五篇泛論治國修身之要雜以九流之說
袁孝政注據郡齋讀書志載爲唐人舊有序今已佚矣前有大
泌山人李維楨序萬曆壬辰海虞蔣以化入長安得道藏本因
刻於孝昌署中自爲後記

顏氏家訓二卷

明刊校宋七卷本

北齊黃門侍郎顏之推撰

此書爲明建甯府同知績溪程伯祥刊前後無序跋用朱筆照

宋本校改分盡七卷 四庫提要云宋淳熙七年嘉興沈揆本七卷以閩本蜀本及天台謝氏所校五代和凝本參定未附攷證二十三條別爲一卷且力斥流俗并爲二卷之非今沈本不可復見無由知其分卷之舊姑從明刊本錄之然其文既無異同則卷帙分合亦爲細故惟攷證一卷佚之可惜耳似明刊未始不取也

顏氏家訓二卷 明刊本

北齊黃門侍郎顏之推撰

顏訓以七卷本爲佳此則萬厯三年復聖六十四代孫博士嗣慎重雕程伯祥本也有萬厯甲戌翰林修撰新安張一桂及子慎行兩序

顏氏家訓七卷 抱經堂校定本

北齊黃門侍郎顏之推撰

右七卷爲江陰趙曦明敬夫注解餘姚盧文弨紹弓補前列盧氏注自序又宋本無名氏序例言十二則後顏黃門傳宋本沈揆跋宋本校刊銜名乾隆五十一年趙曦明白識盧撰曦明傳例言中云沈氏攷證一卷繫之書後今散置文句之下取翻閱較易原刻可稱極善抱經老人復於刷本補校數處眞善而又善也

化書六卷

明宏治刊本

紫霄真人譚景昇撰

有嘉祐五年夏四月碧虛子題化書後序前爲宏治甲子二月光祿寺少卿李紳縉卿序云宋潛溪先生評其文高簡可亞關尹子其於黃老道德實有所見天順間代府版行歲久磨滅方外鄭君常清深得是書之旨謀於定州劉達捐資壽梓

照德新編三卷

明嘉靖刊本

光祿大夫太子少傅上柱國瀘淵晃迴撰

前有迴自序又景祐三年鎮國軍節度使檢校太尉駙馬都尉
上柱國李遵勗撰序目錄後有慶元己未校官黃汝嘉刊嘉靖
戊午翰林院檢討中眷裔孫晃璫重刊禮部鑄印局儒士侯汀
膳錄三條又卷尾木記嘉靖甲午瀘淵晃氏寶文堂刻

經鉏堂雜誌八卷

明刊本

宋霄川倪思正父

前有萬歷庚子仲春花旦吳興居實子潘大復序又倪文節公
宋史本傳後有潘振藩藻生跋是編爲文節晚年劄記務爲退
隱高曠之說不免雜於釋老

聲隅子獻猷瑣微論二卷

宋刊本

季振宜徐乾學嚴元照藏書

蜀人黃晞撰

前有自序述十篇相承之旨曰生學曰進身曰揚名曰虎豹曰

仁者曰文成曰戰克曰大中曰道德曰三王每篇仍冠以小序
晞字景微蜀人嘗聚書數千卷學者多從之游著聲隅獻猷瑣
微論石介聞其名使諸生如古禮執羔雁束帛就里聘補學職
辭不就韓魏公爲樞密使薦之爲太學助教而朱子近思錄中
亦稱之書錄解題曾載此書宋藝文志雜家類又有獻猷子一
卷疑卽此本阮氏元進呈 內府鮑氏廷博刊入知不足齋叢
書皆以此爲底本疊經季振宜徐健康嚴九能收藏有印記跋
語

習學紀言序目五十卷 明鈔本 馬笏齋藏書

宋葉適撰皆取經史諸子及呂氏文鑑論述之多縱橫博辨之
言雖義理未純文詞可取嘉定十六年門人山陰孫之宏序又
癸未新安汪綱仲舉後跋南陽道穀題識後記云習學記言序
目六本共六百七張用價口千八百文崇禎丁丑歲冬十一月

廿八日記瑞安孫衣言用朱筆校正以之刊永嘉叢書爲底本
也有古鹽馬氏笏齋珍藏之印

拘虛晤言一卷

明刊本

四明陳沂著

右書雜說三十四條大旨用兩事比類取譬申明其義於下頗
似連珠之體而不用韻沂四明人故天一閣曾進此書於翰林
館

竹下寤言一卷

明刊本

海鹽王文祿言

前有自序云子居後萊芸樓前有竹萬竿時盤桓其下或對客
談或游藝籍或靜而思恍然有覺卽錄數言聊以舒適題曰竹
下寤言其書入四庫存目

閒適劇談五卷

明萬曆刊本

韓小亭藏書

三吾寄漫子鄧球著

球祁陽人嘉靖乙未進士官至銅仁府知府是書後有萬曆癸未之夏自跋託言遇一遠朋隱冠野服不對姓名雜論象理三教設爲問答編元亨利貞爲四卷後一卷題起元集殆取貞下起元之義耳末題男雲臺梓於鎮祁樓僧舍有玉雨堂印韓氏藏書二圖記

七克七卷 明萬曆刊本

西海龐迪我撰述武林楊廷筠校梓

前有萬曆甲寅龐迪我自序大抵謂謙讓以克驕傲仁愛以克嫉妬捨財以克慳吝含忍以克忿怒淡泊以克飲食絕欲以克色迷勤事以克懈惰著爲七篇曰伏敝曰平妒曰解貪曰熄忿曰塞賢曰防淫曰策急鄭圃居士楊廷筠首爲序云龐號順陽子未與一面聞其居長安大官授餐朝廷禮遇名流多與之遊

晉人曹于汴上饒鄭以俾南州熊明遇江東崔涓及陳亮采皆
爲撰序

金疊子上篇二十卷中篇十二卷下篇十二卷

明萬曆刊本
病藏書

陶去

明上虞陳絳用揚著會稽陶望齡周望閱車任遠遠之校

絳字用揚嘉靖甲辰進士官至太僕寺卿其書蓋仿其鄉人王
仲任論衡而作也博引古事加以論證名曰山堂隨鈔不爲詮
次陶太史讀而歎曰是不可混於偏記更名金疊子同邑車任
遠撰傳命其子陳昱刻之望齡及上虞令海虞徐待聘南昌舒
日敬同序焉有陶去病圖書印擷芳園印文漪堂印

右雜家類雜學之屬

白虎通德論二卷

明翻元本

忙府藏書

漢班固纂明楊祐校

後漢章帝紀建初四年十一月壬戌詔諸儒會白虎觀講議五

經同異使五官中郎將魏應承制問侍中淳于恭奏帝親稱制
臨決如孝宣甘露石渠故事作白虎奏議注云今白虎通又班
固傳曰天子會諸儒講論五經作白虎通德論令固撰集其事
此書所作之由也宋本原分上下二卷通德爲作建德最後三
篇在爵號謚之次性情篇中頗有勝近本者盧抱經學士刊入
羣書拾補中惟元大德九年劉平父刻作十卷與陳氏書錄解
題卷數相合每半葉九行行十七字此本前後無序跋題爲明
楊祐校行數字數與元版合惟卷分上下耳按十卷次第以爵
號謚爲首五祀社稷禮樂次之封公侯京師五行次之三軍誅
伐諫諍鄉射致仕辟雍災變耕桑次之此爲上卷封禪巡狩攷
黜次之王者不臣蕃邇聖人八風商賈次之文質三政三教三
綱六紀次之性情壽命宗族姓名天地日月四時衣裳五形五
經次之嫁娶次之紼冕喪服崩薨終焉此爲下卷暇當鈎勒以

仍舊第有明善堂珍藏書畫印記宣城李氏石室圖書印記

白虎通德論二卷

明刊本

漢元武司馬班固纂集明新都俞元符重校

前有大德九年東平克齋張楷序稱唐藝文志載班固等白虎通義六卷欲見未得余分水監歷常之無錫有郡之耆儒李顯翁胸攜是帙來云州守劉公常藏舊本公名世常字平父迺大元開國行省公之子魯齋許左轄之高弟收書萬卷惟此帙世所罕見郡士請歸之於學鏤版以廣其傳守慨然許之求余識於卷首仍刻劉世常原序及大德乙巳東平嚴度恪齋序又後學蜀昌冷宗元序云子寅長遼陽傅公鑰刻於太平可謂文以飭吏而爲用世之通儒也又有反璞子重刻引云封禪章述甫二字竊意當作蕙蒲蓋詳下文自釋孝道至蓮甫生葉大於門扇不搖自扇攷韻會正韻皆訓蕙蒲爲瑞草又訓蕙爲扇釋義

竝與此同必有所本槧刻精工尙存古式

獨斷二卷 明漢魏叢書本 盧抱經藏書

漢蔡邕著

是書有宏治間劉遜重刊本此乾隆癸酉盧抱經以程榮本吳琯本胡文煥三本對校朱筆摘錄程本後跋云右蔡氏獨斷一編古之制度文爲類於此乎攷錄本多舛今稍是正而刻之舒頻滔熙庚子六月初吉江都呂宗書又墨筆云吳槎客駕以百川學海本示余尙是宋舊因細校一過有文昭校正盧氏藏書兩印

崔豹古今注三卷 明刊本

晉崔豹正熊撰舜江韓忠子進校正明進士陳武惟鉉重校

後有眉山李某跋云晉太傅崔正熊撰其書七篇雜取古今各物各爲攷釋頗爲該備又多異聞雖晉史不著其名氏行事然

以族繫攷之知爲瑗寔之後嘉定庚辰東徐丁黼記云左史李公守銅梁日刻崔豹古今注余在上饒得郡學再三參訂於第四篇下頗多增改故又刻之藥門嘉靖癸巳東吳陳武又爲校刻

近事會元五卷

舊鈔本

鮑氏知不足齋藏書

贊皇李上交撰

前有嘉祐改元長至自序起唐至德而下盡周顯德之前凡五百事目曰近事會元足補唐書五代史之闕兩京新記之佚第三卷中依目錄脫去改正茶稅法社倉義倉貸義倉支用賒糶常平法五條蓋舊闕也舊有萬厯壬午夏五元素齋錄副本又尺牘菴傳錄屏守老人手跋乾隆辛丑鮑以文又傳錄枚菴本重加校勘有古歡書屋老屋三間賜書萬卷錄西長塘鮑氏知不足齋藏書印世守陳編之家得知千載事上賴古人書諸印

東觀餘論二卷

明萬曆項氏刊本 馬笏齋藏書

左朝奉郎行祕書省祕書郎黃伯思撰

伯思字長睿邵武人元符三年進士累官祕書郎自號雲林子別字霄賓李忠定誌其墓稱好古文奇字鍾鼎彝器款式體製悉能了達辨正卽指此書是編卷上題法帖刊誤卷下乃題東觀餘論有大觀戊子歲伯思自序又有嘉定年樓鑰序紹興丁卯其子黃訥跋又前一序稱川本去卅一篇云云後有跋稱是書刊於庚午之秋俱不題年月名氏此本前題秀水項篤壽重校並萬曆甲申篤壽重刊引卷尾有嘉禾項氏萬卷堂梓長圖方式木印字畫精工流傳絕少 內府天祿琳琅亦珍藏之有讀史精舍武原馬氏藏書諸印

猗覺寮雜記二卷

舊鈔本

宋朱翌撰上卷皆詩話止攷究典據而不詳詞意之工拙下卷

藏書志卷十八

三

雜論文章兼及史事前有慶元三年四月番陽洪邁序云上下兩卷凡四百三十五則故紫微舍人桐鄉朱先生之所記也後有何杞瞻焯朱筆記四則又錄錢功父題識一則末輯朱先生詞三章提要云鮑氏知不足齋書本割其下卷六十八條移入上卷以均篇葉殊失古人著書之意今仍原本分卷焉此舊鈔本在 四庫館以前

能改齋漫錄十八卷 鈔本 小山堂舊藏

臨川吳曾虎臣集

分事始辨誤事實沿襲地理議論記詩記事記文類對方物神仙鬼怪十三類吳尺鳧記云聞之毛丈斧季言此從祕閣鈔出缺首尾二卷焦弱侯所傳本以第二卷第十七卷均分作二卷實非完帙所著雖小書安有開卷卽辨樓羅二字道破顯然可知吳石倉傳鈔於尺鳧鮑以文按之刻入知不足齋叢書此

帙前爲趙氏小山堂鈔後爲趙氏星鳳閣鈔中間配鈔數卷

雲谷雜紀四卷

盧抱經校聚珍本

宋張昞撰

昞以紹定元年由奉議郎致仕學問該洽著述甚多嘗續施宿會稽志是書惟文淵閣書目載有一冊其本亦佚館臣從大典中採撮一百數十條并以徐邦憲書帖一首昞識語一則冠於卷端此書於諸家著述析疑正誤多所釐訂盧文弨更校正誤字有弓父手校圖記

西溪叢語二卷

明刊本 吳尺鳧藏書

宋劉川姚寬撰

前有紹興昭陽作噩仲春寬白序又楊臨溪刻之武昌敘曰宋姚寬無顯名觀其自敘蓋博聞多識之士也又自言嘗按牘外出守會稽善天文言時事有驗將除郎卒官止六部監門四

庫提要則謂寬字令威歟縣人父舜明紹聖四年進士南渡後
歷官戶部侍郎徽猷閣待制寬以父任補官仕至權尚書員外
郎樞密院編修官其書多攷證典籍之異同黃薊園士禮居藏
書題跋西溪叢語最舊爲鴉鳴館刻此本是也有吳尺鳧蟬花
居士手識云此卷華山馬基中所貽有淮南小隊繡谷薰習蟬
華諸印

容齋隨筆十六卷續筆十六卷三筆十六卷四筆十六卷五筆十卷
明翻會通館活字本 朱子傳馬芴齋藏書

前有嘉定壬申臨川何異序宋史洪邁列傳景廬自序續筆紹
熙三年自序三筆慶元二年自序四筆慶元三年自序五筆原
有嘉定壬申邱櫟序云筆爲卷各十六咸冠以序五獨十卷而
無題辭蓋未成而絕筆也又有嘉定十六年姪孫伋識又臨川
周謹識云隨筆初刊於婺自緒至五繼刊於章貢歲久字漫不

可復辨紹定改元得建溪刊本參校鈐梓庶幾流傳益廣邱洪
周三序印本闕華燧序亦闕暇當補寫有朱子偕印古驢馬氏
笏齋珍藏之印

容齋隨筆十六卷續筆十六卷三筆十六卷四筆十六卷五筆十卷
明崇禎刊本 嚴九能校藏

此書爲嘉定馬元調得宏治戊午河南巡按李瀚刊本重爲翻
雕前有謝三賓序嚴九能先生用別本手校自題其後云洪文
敏公以卓絕之才得賢父兄之助讀書多歷宦久其所著容齋
隨筆五集爲卷七十有四總千一百七十餘則古今人物之賢
否事勢之得失以及諸子百家遺文佚事無不著錄而汴京臨
安典章制度言之尤悉按其論說皆平允明通無穿鑿苛細之
病名儒之學與淺見謾聞之徒知其一而不知其二者故不同
也又補錄邱橐洪俱周謹序於卷首

演繁露十六卷續演繁露六卷

明刊本

宋龍圖閣學士宣奉大夫權吏部尚書新安程大昌著

前有酒熙庚子大昌寓吳與自序曰演繁露非敢自列於董氏以其董出而董名之自識其意焉耳後有嘉定庚辰男覃敬跋書中所演雖非董之本意而名物典故攷證詳明實有資於小學所引諸書多注出某書某卷亦可爲援據之法正編不分類續編分制度文類詩事談助四門明萬厯丁巳建武鄂漢得自謝耳伯恨世不甚傳因刻置文遠堂以貽同好并列宋史本傳此卷九至十六皆影原書補鈔有欽獎世守陳編之家一印野客叢書三十卷附野老記聞一卷

明嘉靖刊本

長洲王楙

前有慶元改元三月楙自序嘉泰二年十月楙再書於儀真邵齋云此書自慶元以來凡三筆矣繼觀他書間有暗合不免爲

之窺易後附郭紹彭所撰先生壙銘高郵陳造唐卿跋雕刻極精長洲吳曜手寫也

賓退錄十卷

影鈔宋本

大梁趙與峕

前有自序云余里居待次賓客日相過平生間見所及喜爲客誦之意之所至賓退或筆於牘聞見滋久不覺盈架欲棄不忍因稍稍傳益析爲十卷而題以賓退錄後自續記云錄中及近世諸公或書諡或書字或書自號不得已者傍注其名惟事涉君上則直名之蓋君前臣名之義末有寶祐五年陳宗禮序稱君字德行嘗從慈湖先生問學臨安府睦親坊南陳宅經籍鋪印一條在卷尾康熙庚寅何焯校記道光間顧廣圻記云右影宋賓退錄其行間疏密殊不失舊觀何校亦頗有發明惜後二葉有損字處然較近刻自勝此從湖州陸氏藏本影鈔

學齋佔畢四卷

明覆宋本

前有淳祐庚戌眉山史繩祖慶長自序於梓潼極堂景定壬戌門生鄱陽郭因謹跋云學齋先生無書不讀讀而有所疑則思思而有所得則錄名之曰佔畢所以惠後學者至矣

鼠璞一卷

舊鈔小字本

桃源戴埴仲培父

鼠璞者蓋取周人宋人同名異物之義書中皆攷證經史疑義及名物典故之異同持論多爲精審說郭格致積知不足齋並分作二卷此猶宋時一卷之舊

朝野類要五卷

舊鈔本

文昌趙昇集錄

秀水沈叔埏用惠棟本校并手錄端平丙申趙升自序於前並識云趙昇惠本作趙升每葉皆府仁錢三學生並敷文肄業生

童分爲繕錄有梅石居劍舟叔埏諸印

困學紀聞二十卷

元刊本

浚儀王應麟伯厚

前有至治二年秋八月辛應龍序又泰定二年冬十月門人袁
桷序目錄前深甯自識後有伯厚甫深甯居士印二方末有泰
定二年慶元路儒學教授吳郡陸晉之敘及孫厚孫甯孫校正
慶元路儒學學正胡禾監刊兩行按本傳宋亡先生年五十四
杜門不出取經史講解論辨所撰諸書大抵成於是時自題晚
遇艱屯可以證明歿於元元貞二年年六十有四此距先生歿
時正三十年是最初之刻也

困學紀聞二十卷

明刊本

李明古藏書

浚儀王應麟伯厚甫

前有至治二年辛應龍序自序後按目錄朱筆記丙戌春爲故

友間百詩先生較此書付之開雕因記諸第一卷尾後墨筆記云是書爲李君明古自序首至一卷十一葉俱照義門先生勘正楷法精整余於雍正戊午得之珠明寺前書攤乾隆丁卯同陳君元璩寓秦淮河亭因借得其尊人校本校勘二卷第三第四第五第九第十則陳本缺長洲陸觀潛有端門小印又有蘅香草堂陸沆之印靖伯李氏收藏木彊人李鑑諸印彌字明古吳縣人家多藏書

困學紀聞二十卷

馬氏叢書樓刊本

顧敬齋校藏

浚儀王應麟伯厚甫

前有至治二年牟應龍序泰定二年袁柳序又陸晉之序深宵叟自識後接目錄康熙三十七年閻詠識後有乾隆戊午祁門馬曰璫重刊跋又顧敬齋震於乾隆甲午秋仲跋於濟甯南門外過齋云今春逗遛邗上陳君繩之以馬氏本贈行旣而暫住

任城聊避炎暑因於掌教盛同年秦川處獲見全謝山前輩批
本欣然假歸寓舍卽以馬本校錄自七月十四日開卷至八月
十六日錄畢盛本係汪氏所刊兼載何義門閻百詩兩家評注
予所攜馬氏本專載閻批然彼此多有互異想傳寫之謬耳其
有與本書無所發明徒誇徵引者亦不盡錄錄者以何云二字
別之謝山太史批注似更精富蓋於其鄉先生之書更不敢率
意下筆耳同年盛君學有根柢間綴數語亦並載之旅居岑寂
頗少俗累焚膏繼晷得與此書相晤對者一月有餘自幸福分
爲不淺爰記大略附書卷尾震又號葦田錢塘人乾隆辛巳
進士官至刑部貴州司員外郎著有得一齋詩稿

識遺十卷

舊鈔本

黃星橋藏書

古羅羅壁

壁字子蒼自號默耕新安人傳朱子之學讀書敏求記所舉是

書記孔子生卒年月爲足資攷證 四庫館臣謂講學之家猶可稱言有根柢前有自序數語明隆慶間姑蘇吳岫稱其攷據確而精論斷審而正可概其餘此卷末有虎林星橋黃杓手跋爲丙戌消夏所錄又其兄黃模題云藝祖龍興視學頻儒風一代啟關閩均平可是資經術滄海橫流尙有人寒雨瀟瀟打六更妖蜚蝕日告凶類白頭遺老身爲虜猶憤偏安誤相秦吁可慨矣模字相圃仁和者宿居張紗街

古今原始十四卷

明刊本

桐城趙鈺鼎卿著

前有嘉靖壬戌自序以爲所載一事自爲一始後所踵襲而行者其末也有善有不善亦自可攷鏡焉其書自天地人皇氏迄元明頗紀歷代掌故於有明一代尤詳足資攷證前有貴州按察司提學副使高安况叔祺序稱中丞杜野趙公博雅精擇游

心太始閤於著述要歸大道馬平鶴樓張紳序稱柱野公少魁
畿甸通籍卽留侍撻掖爲名給舍以至今中丞凡二十年條陳
天下之利病與撫輯一方之民夷可謂罔有暇日矣而猶能手
不停披目不輟覽以折衷古今之要爲是書如此豈待窮而文
工困而言立者耶

丹鉛總錄二十七卷

明嘉靖上杭刊本

祁氏淡生堂藏書

博南山人升庵楊慎用修著集滇南心泉梁佐應台校刊

慎新都人大學士廷和子正德辛未進士第一以諫大禮謫戍
金齒以終明史有傳書分二十六類曰天文地理時序花木鳥
獸宮室冠服珍寶音律物用人事人品史籍訂譌宗學官爵博
物禮樂卦名飲食千支數目怪異身體詩話瑣語前有嘉靖壬
寅自序又福建按察司僉事滇南門人梁佐序蓋分類夏輯名
曰總錄又上杭知縣豫章郡靖安趙文同後序此爲藍色印本

有澹生堂經籍記曠翁手識山陰祁氏藏書之章楊鼎私印重
遠書樓諸圖記

丹鉛續錄十二卷

明嘉靖刊本

新都楊慎著崑山周復俊校

前有自序一二爲經說三爲攷證四爲辨字五爲評文六爲雜
識七爲拾遺八至十二皆不分類也

楊子卮言六卷

明嘉靖刊本

鳴野山房藏書

成都楊慎著劉大昌校

成都劉大昌泰之序云升庵太史公握節渙雲三十六年閉門
著述數十餘種若丹鉛總錄要錄諸籍翊前聞昭來裔傳刻海
內久矣咸晚尋醫江陽寓簡圭里示余卮言凡數卷首陳尙書
二解尊聖製也次諸經子史次文議字說以及天文地理鳥獸
草木廣大悉備觸處洞然明齋楊公以甲科碩望假合新都始

至訪公元亨悵然宿草乃撫其遺孤采獲遺集因閱茲帙屬余
校梓時嘉靖甲子夏四月有鳴野山房印

正楊四卷

明隆慶刊本

沈肖巖藏書

汝南陳耀文晦伯甫

前有隆慶乙巳孟冬自序又順陽李襄序云成都楊用修著丹
鉛錄等書至數十百種則陵陳君晦伯間取其誤謬分疏其下
得一百五十條悉撮原本無假辨說開卷瞭然固譚藝者之一
快也有東山外史肖巖沈氏藏書之印兵燹之遺兩印

析醒漫錄六卷

明刊本

曹德圃藏書

嘉興陳懋仁無功著

此書 四庫入附存有橋李曹氏藏書印曹溶印詩龔書畫記
當經法梧門庶子收藏耳

右雜家類雜攷之屬

善本書室藏書志卷十八終